

20 Aut puer aut longas compta puella comas.
 Questus eram, pharetra cum protinus ille soluta
 Legit in exitium spicula facta meum
 Lunavitque genu sinuosum fortiter arcum
 'Quod' que 'canas, vates, accipe' dixit 'opus!
 25 Me miserum! certas habuit puer ille sagittas:
 Uror, et in vacuo pectore regnat Amor.
 Sex mihi surgat opus numeris, in quinque residat:
 Ferrea cum vestris bella valete modis!
 Cingere litorea flaventia tempora myrto,
 30 Musa, per undenos emodulanda pedes!

II. Esse quid hoc dicam, quod tam mihi dura videntur
 Strata, neque in lecto pallia nostra sedent,
 Et vacuus somno noctem, quam longa, peregi,
 Lassaque versati corporis ossa dolent?
 5 Nam, puto, sentirem, siquo temptarer amore.
 An subit et tecta callidus arte nocet?
 Sic erit: haeserunt tenues in corde sagittae,
 Et possessa ferus pectora versat Amor.
 Cedimus an subitum luctando accendimus ignem?
 10 Cedamus! leve fit, quod bene fertur, onus:
 Vidi ego iactatas mota face crescere flammam
 Et vidi nullo concutiente mori;
 Verbera plura ferunt, quam quos iuvat usus aratri,
 Detractant prensi dum iuga prima boves;
 15 Asper equus duris contunditur ora lupatis,
 Frena minus sentit, quisquis ad arma facit.
 Acrius invitos multoque ferocius urget,
 Quam qui servitium ferre fatentur, Amor.
 En ego confiteor: tua sum nova praeda, Cupido;
 20 Porrigimus victas ad tua iura manus.
 Nil opus est bello: veniam pacemque rogamus,
 Nec tibi laus armis victus inermis ero.
 Necte comam myrto, maternas iunge columbas!
 Qui deceat, currum vitricus ipse dabit,
 25 Inque dato curru, populo clamante triumphum,